
SEOKGIMIN POETRYRANG


D. S. NENGMINZA



This book belongs to
SEOKGIMIN POETRYRANG

D. S. NENGMINZA

Formerly Head Master, Baghmara M. E. School



GARO HILLS BOOK EMPORIUM

HOWAKHANA TURA

Published by
Sushil Kr. Das
Hawakhana
P.O. Tura-794001
West Garo Hills (Meghalaya)

Fourth Revised Edition 1975
Fifth Revised Edition 1978

[*All rights reserved*]

Price Rs. **3.50**

Printed by
K. C. Pal
Nabajiban Press
66 Grey Street
Calcutta-6

This book belongs to Garo

BRIGIPA CHAPA KA·ATTAIANIO AGANANI

Ia brigipa chapa ka·attaianio adita ruuta somoiko rana nangahani gimin, poraigiparangna bakbakkale onna manjaha;; maina re·anggipa adita bilsirangna chapa karani lekarangko manna neng·anichi aro chapa karani korosrang rang·san tang·doanichi chapa ka·aniko a·bachengatna man·ningjaha.

Iako chapa ka·attaianio anga Garo Hills Book Emporiumni Shri Sushil Kr. Das·ko mitelha ga aka maina ua bang·a neng·nikanirang dongoba chapa ka·aniko jako ra·e da·o matchotatna man·aha.

Haida ia chapa ka·attainio gualanirang dongode, ka·sapae ang·na uiatpaode mitelbeani ong·genchim.

Tura
7th October, 1975

D. S. Nengminza

SULSUL MESOKANI.

<i>Kata Bichong</i>	<i>Jak</i>
1. Salingni agana	... 1
2. Basako	... 5
3. Atchiram A'song	... 6
4. Isol nama	... 7
5. Askirang	... 7
6. Mumuani	... 8
7. Man'rikani	.. 9
8. Miktoksi	... 10
9. Miksongani	... 11
10. Kamni Bite	... 12
11. A'chik asong	... 13
12. Sengwat	... 15
13. Pangipa song	... 16
14. Wachimiting	... 18
15. Randi Me'chikni Sinte	... 20
16. Golap Bibal	... 22
17. Hobani Sinteani	... 24
18. A'chik Ku-rang	... 26
19. Sigimin ripengko gisik ra'ani	... 29
20. Do-kua	... 31
21. Nang-ko gisik ra-gen	... 34
22. Ripok Do-katchi	... 37
23. Tingtotsa chini git	... 41
24. Hagar	... 43
25. Nepoleonni katta	... 51
26. Podinini Katta	... 54
27. Pa'sikani	... 62

28.	Raraani	...	63
29.	Nang'ni Jako	...	64
30.	Skiani	...	64
31.	Namgni Gri	...	65
32.	Gangipa	...	66
33.	Seng'wat	...	66
34.	Sangkini	...	67
35.	A'songtangna Bi'ani	...	68
36.	Gummi Dingtanggrikani	...	68
37.	Mitelani	...	69
38.	Aganmeapaanirang	...	70

1. SALLINGNI AGANA

I. BALROROKARI

Salguri mitmat mitmat,
Wa'ambong tiptap tiptap ;
A'sro siao siao,
Salchichaa mitchao mitchao.

A'kinte chadipana sipsap,
Agatek a'ba tua gekgak,
A'an'ma manggisijok,
Bolnima jakrurongjok.

Wa'an'ma bangsi sike,
A'ko dimu kitbajok ;
Bolnima knal sike
Bolko bijak akbajok.

II. WACHI KARI

A'galmak sinil simil,
Chiabak kimil kimil ;
Sangkira a gil pinjok,
Mikkasim jarim simjok.

A'mong a'du so'ako mikmak,
Chikol an'cheng danako dandak.
Bolchim bite rongrongte dakjok ;
Ang'ke danok parangga bitjok.

Dimbil chama chatmiting bakritjak,
 Bolo, ta'jong wegajok jakripat.
 Am·pang agal baliping baljok ;
 Ta·ja narot gongriting chajok.

Jongtikket tikket, tikket ;
 A·kisang mitek, mitek ;
 Chiringo mite achak bekbak ;
 Patalo domaski jikjak.

A·skochi doabot tengtang,
 Bolgrimo jingjimbeng chengchang.
 Bri rike snaru baljok ;
 Chiring chisik chiwaring tangjok.

Wachi dilma a kinte golijok ;
 Misi a·ma bolganchi suakjok.
 Me·a gal·mak pekwatjok.
 Angke bi·sa sa·watjok.

Tebidil dildirajok ;
 Ang·kesep malpripajak.
 Bima na·tok sambalna dojok,
 Bolni bite agatchi minjok.

Mikkasim pripri,
 Bolko dodol dokmiting ;
 Samsmit mri mri,
 Jong·dol nating bitmiting.

III. MISI KARI

Misi a·ma gakuteng ong·jok ;
 Saksan a·ba mikkuteng tujok.
 Salniango chenggari satjok ;
 Rongbirako sepru maljok.

Bolni bite gasambe minjok ;
 Chiring ang-ke manggni bang-jok.
 Chram bite ranggure akjok ;
 Ruat skal golikeng maljok.

Misi ningo te-chambil minjok ;
 Boldimgrimo dokru sa-jok
 Bolni renggok bilchajok changtok ;
 Chini na-ma merajok ku bok.

Mikkasim ja-chang ja-chang ;
 Misigong ripang ripang,
 A-ko a ja galange,
 Samdim boldim suange.

A-ba chotna sikkoko,
 Samni guktom chengrikang biljok ;
 Suna samdim sikkoko,
 Chipu chalang gitokteng maljok.

IV. MITE KARI

Bilsin' ja jadokjok,
 Mima birong gilbokjok.
 Bima rongma rimila mikajok,
 Na-chi ku-dep chisikna dobajok.

Jong-dol nating ga-kite ganjok,
 Chengkottama bangtike tujok.
 Ganti ringringbajok balmao ;
 Jong-dompa sringbajok ramao.

Dandirak gakgakbajok dareo ;
 Matchak chakchakbajok a-seo.
 Te-rik wa-pang gangchajok riprang ;
 Spin chalja kebajok bangjang.

Kil bigongo gukchru kilding rikjok ;
 A·gitoko gitoke matchru inobajok,
 Jalik wa·pang rimitchin, minmiting ;
 Rasin gingpang similding, balmitrang.

V. A·RAN KARI

Jabirong Asin jajok ;
 Sinkari me·gong baljok ;
 A·an, me·ga sangkijok ;
 Kitma bite mikkijok.

Udareko tilareng sujok ;
 Akkaruko okubu wang·jok.
 Lau patchal nokgilo donjok.
 Chikareko dopakal donjok.

Daninka ongbakjakjok ;
 A·kinte a·mang rakjok.
 An·cheng nokma danmiting ;
 Bima kasi balmiting.

A·bikil kesubajok ;
 Tamaku bijimbajok.
 Chidil guuribajok ;
 Samna ripamchibajok.

Chini birong chepangjok ;
 Samin kambe bonangjok.
 Doaran ongonbajok ;
 Dosisi jepjebajok.

Noksam, nokil adanggit choknokjok ;
 Chiring, chisik na·chiteng ong·onjok.
 Mat, mese bolkolko watjok,
 Na·tok na·bat warina katjok.

Chaging rongchu similding namiting,
Me jak sireng rimitchin balmiting.
Sin'a chakna sa'rao tomjok,
Kangal am-pak bolbigil kikjok.

2. BASAKO ?

Minggenma an tangko atchijok rasongo ?
Atchie man paja indaka biapo.
Dongnua angni song gipinni mitino,
Nikjake gipinrang an-tangni sambao.
Dongenga dongnue a-ningni gam gita,
Nikatgen basako somoiko uija.

Tikjama saksana agilsak gimiko ?
Re baon dongchenga on-gimin biapo.
Donggenchim maiba gisikko katchaatna.
Salantin' balrangko on-tisa tang-atna.
Nangaijok da'o gisiko sikkimna,
Namkalgen basako man-jake uina.

Kraama nikbadena galchange an-angko ?
Re genma watange on-gimin a-songko ?
Ingenma jechake ang' a-song ong-jasa ?
Krengjama dal-atna pangnan batesa,
Dongenga gamrang rong-kolo gitasa,
Ong-katgen uarang badia salosa ?

Gualja songtangko gipinko nikenba,
Man-pagen namatna maibako dakenba.
Rangspita nikpae jawani dal-ako,
Denggoka krachae an-tangni skoko.
Mikrakja salni sal sari gri tuaoni,
An-pilgen basako andala waloni ?

Matnanggen an·tangni onana sako f
 Namatna songtangko an·tangni jako.
 Re·baha salrang uina an tangko.
 Krenga pilakan namatna jattangko.
 Dongenga tusie mikgronko ogija,
 Mikrakgen basako, somoiko uija.

—*Jonmoni D. Shira.*

3. ATCHIRAM A-SONG.

Mia, misi, ranga, gama, a·gilsako bibal gapa,
 Un' gisepo songsa donga, darang songna bata ;
 Jajumangchi rika uko, mingsingachi pata.

Indonga song bano man·gen na·a am·obani ?
 Ang' atchiram a·song uan darang songni rani,
 Uan darang songni rani, darang songni rani.

Bolantio bibalrara, bolgrimrango do·o mikoa,
 Bibal bitchi bija dima, bilbaenba jinma,
 Bibal bitchi ope, bibal sako tusichipa.

Bal ka·sina ka·sinjrimjrim, a·bri mikkim andalsimsim
 Bano donga a·ba tangsim, salgi chaprim chaprim ;
 Mi kosako merapaa balwa balbing balbing.

Sal, ja, aski, ringrang ringrang, salgi mikkang ronggrikara,
 Sagal biba pindapenba, wae riprapronga ;
 Songni dedrang do·o k·urangna tusio mikraka.

Ma·ni, noni, jongadani ka·saa gita ka·sako
 Am·angoba man·jawaha gipin a·songrango ;
 O, Gitel, ang atchiramon sina bi·a nango.

—*Tuniram Rongma Marak.*

4. ISOL NAMA

Tangsima burung, nitoa a barang,
 Salgini aram aro baglpa bibalrang
 Aganenga, "Isol nama."

Dikdiksa tangaigipa chonpipa jo ongrang,
 Balsriri balgipa balwani ku rang
 Aganenga, "Isol nama."

Bilsijolijol jokenggipa a ani chirang,
 Sako bilgipa, a o rogipa do o, matrang
 Aganenga "Isol nama."

Pokpekgipa sagal badegija a gachi,
 Pe gija niamko tangpilange biapchi,
 On eng saki, "Isol nama."

Salgini kotok sal, ja, aski,
 Mesoka rasongko an tangni ching achi,
 "Isol nama."

Sal salanti chasongni chasongna
 Mitela bon jawa an chingni Gitelna ;
 Maina Isol nama.

—Kosan G. Momin.

5. ASKIRANG.

Mingnama man ja, chanao amja chingipa salgio,
 Chingcheta tengatna aski salni napahaon.
 Megimu gitchak, bilgipa sengwat bitsim andalao,
 So gipa chaki ching ata hira rajarangni noko.
 Ua gita chanchimana Isolni dakako,
 Manderangni namgnina uni ongatako.

Jamanchakja brangrikja an-tangtang biapo.
 Re-a jringna ramatangko salgini bangbango.
 Mitela nang-ko walo songree rogiarang.
 Nikata ramako nang-ni jamikchi teng-arang.
 Nengnikenba gipin gita tusipagenode,
 Min-dik min-dak andalgenchim da-nang agilsakde.
 An-tangni dakgimin na-a pilak janggirangna,
 Mesokenga rasongtangko nike chanchichina.

—*Kosan G. Momin.*

6. MUMUANI.

Tusibo, tusibo, dede racha daldi,
 Ka-saachi mumua ang' gisik ka tongchi;
 Jaranbong salgio nabamiting,
 Bal k-sin salgipeng balbamiting.

Tusibo, dede, na-a

Tusibo, dedea, angni noar...ra.

Aski, tanori, sonani biginchi,
 Jajonga sonan' ga-tong, re-babo dedechi;
 Dedea niboda uarangko,
 Gong-jao tusibo ma-an ka-bako.

Nangni ja-dalo, gisik sokbakalo,
 An-chengko mande dake, kasiko do-me pote,
 Rokande, dedea, chibima sambao,
 Rongtala chisamni kasi gopo.

Nang'pa anti re-anga, nang-na ra-batokgen
 Kal erona rekrektoḱ aro ba ra gitchak,
 Jelapi batasa aro do-chi,
 Rongchuming terika monarachi.

—*Kosan G. Momin.*

7. MAN·RIKANI.

Nokmani dea man·rika a·ako,
Ro·ongni itni namgipa nokko ;
Man·rika mata gri rinoka jakko ;
Sinana kengipa nomg·gipa be·enko ;
Gitcama ba·rako kenata ganpana,
Simteka kanchako kratcha·a chinpana.

Iana agreba jajrenganirangko,
Man·rika gisiko tomtomatgijako ;
Kenchaka gamtangko chaurang ra·angna
Nokni be·aona, jamni kamaona,
Nomgipa jakrang on·pana dangdike,
Kenchaka amjawa siatha aldue.

A·ani rakana ja·bigil ritchaja,
Wachini salrangna kang·kare gongdoja
Meskak mechua man·paja golina,
On·tisa nanggaka saata salsana ;
Nangaha asongna dongtoa chokic,
Neng·ao tusina so·opa palango.

Kangalni dea man·rika maiko ?
Dongpama unoba kenani gisiko ?
Raka jadilrang, ritchenga gisikrang ;
Man·rika be·enrang su·uta bigilrang,
Jaktangni raja pangnaba be·ja,
An·tangni salrangko re·atna kenja.

Una agreba mairangko man·rika ?
On·tisa man·paon kusian suaka ;

Ding·ol gramchini sinjetan gisepo,
 Ring·kua ka·sroke ka·dinge gisiko ;
 Indonga kangalo donggipa gunrangko
 Sikpaa rajaba man·pana gisiko.

Kangalchi skia bilko chakchikan
 Chiripjok gisikko a'sakni kamrangan ;
 Jamkugep jamdapko wal skal srakon,
 Ka·giting chadoe chibiman' ripako,
 Nokkoltang sakbriko rakkale ge·eton,
 Mantaiaigen indonga bitipko knalon.

Nokma, nang·naba, banga kamrangde,
 Miknape namana on·ani cholrangde,
 Dongenga chu·gimik, darangba dangdikja,
 Kangalni dedrangde kan·dika jaksokja,
 Sinile so·opa jakko rinoka ;
 Usitna mikchiko jatde ka·donga.

—*Karnesh R. Murak.*

8. MIKTOKSI

1. Nang·ko maian minggenchim,
 Uija nang' bimungko,
 Donaia nang' nitoachin,
 Mingna nangko Miktoksichin
 Mesoka bibaltangko.
2. Dal·o dal·bregija dal·a,
 Timrimrim bandilbalbal ;
 Nio nitoriri bala,
 Wachi a·rak bale kal·a
 Bon·changgija nang' bibal.

3. Chadol tangsek chinanina,
Ba-ra gipok kopinge ;
Ama a-an koe on-a,
Kraa gita nangni be-enna
Nitochina baljringe.
4. Dongna na-a an-sengniĳa,
Songni nokni sa-rao ;
Bimangtangnan kratchanika,
Chinatangnan misilnika ;
Dongna songjinmao.
5. Re-bae neng-e a-baoni
Sa-rao gatimeon,
Game cha-gipan' katchani,
'Ho' ĳe rang sitpoani
Nangni bibalko nikon.
6. Am-a songni manderangna,
On-bo nitoe bale ;
Nangko nike katchachina,
Nitobate tarichina
Songko da-ona batkale.

—*Koplane G. Momin.*

9. MIKSONGANI.

Gadangprak, gadangprak, dogen Rasongni 'briko,
Sokeon churaona janganggen bimungko.

Salantio mingprak mingnama bimungna
Jotoŋ ka-gen ka-sin ka-sin jatko chuatna.

Kaman ka-sae angna cholko on-engode,
An-pilkugen mainasa angara indide.

Be·enan sochina, angni janggiba bonchina
 Watgaljawa tikkelainggen miksongako man·na.

A·gilsakni gam, jin bidyani rasongko
 Bikotnan nangtelaigen donga jeoniko.

Kam mingsa suk, rasong aro toromba
 Gnang, pilak uiani, changa sapaniba.

Dakgni angnin ine pilak nang' kamko
 Dontongjawa salgi dakna ia agilsako.

—*Jonmoni D. Shira.*

10. KAMNI BITE

Mia, misi, tangka sona dongako nikode,
 U'rangoni majkoba man·na sikengode,
 Ma·manti chi·a katta janape agane,
 Duk a·sel kamrangko mesoke pa·sike,
 Ong jaode ka·parika dake kamrangko
 Jo·ton ka·a rusiatna chimong ripingako.

Mika daka kamrangna mitela kattana,
 Ka·sariri malmokani agana ku·rangna
 Nom·ahaode nangni gisik siken onatnasa,
 Bikotanggen on ti on ti saksa maiba mingsa
 Salprak mingprak dake on rotrota gamko,
 Ja·manode gripile bikota gimikko.

Rusimano nangni jako mamung dongjahaode,
 Ong·jaode duk a·selo na·a ga·akode,
 Man·mitingo mikkang ki·sang nisogijaniko
 Man aha da ode an·tang kamni biteko,
 "Dongachi skangode bio rakkina changjasa."

Indine ine mitakari ropilgen batesa.

Namitingo samtangtangchi ripeng bang-beoba
 Dukni salo aganimnan dongjawa saksaba ;
 Uni gimin kakketgija ripengrangko wate,
 Nama kupatianikosa ra·rongbo skie.
 Namgipa mandeni kam pangnaba dintangja,
 Dukni sukni sal sokoba uasa ma·ekja.

Ripeng chomotni gisik nama miksongani
 Man·gen kam kattarango apsan dakchakani.
 Ching·gipa jajongni gimin andalgipa walba
 A·gilsakni manderangni mitela man·aba
 Uandake kaketgipa manden' nangrimani
 Dalgipa ong·a pilak milgipa gisikni.

1. Mika— Tolnapa. 2. Mila— Goka ; andala.
 —*Kosan G. Momin.*
-

11. A·CHIK A·SONG.

1. Minga nangko "A·chik A·song" angni atchiram-
 ko,
 Jeja nan·gni bimung rasong aro nitoako.
 Soñdongramchim mingsinggipa A·chik pagit-
 chamni,
 Jaapa Jalimpa aro Sukpa Bonggepani.

2. Ka·paka nitoa nangni bri chiringrangna ;
 Ka·sroka do'ni matni ring·a ku·rangrangna.
 A·gilsakni chonbegipa a·song ong·aioba
 Nambata an·sengbata angna indioba.
3. Nitoa pul bibal aro gipin balgitorang,
 Gongnok gongnok misarini balwa balo riprang.
 Rang·speo okkapila gunni similana,
 Namedake chanchiode an·tangkon guala.
4. Dongoba songgipino mikron mikbrapatna,
 Ring·bone knatoa ka·tong kasrokatna.
 Indioba simbraata an·tang a·songtangna
 Ja·del bolchaatbagipa angni A·chik songna.
5. Rimangoba saoba angko gipin a·songona,
 Pateoba ganding chinding angko nitoatna ;
 Dongebo songgipino cha·a raja cha·e,
 Ka·a be·a mikchi ong·a anga dongtojae.
6. Dongja angna a·gilsako atchiram songgita,
 Man·ja gam·chatbata songtangni gam gita ;
 Ka·pakkua songtangnade do·oba matba,
 Grapsijo sintikua janggi chu·bandana.
7. Mingbaenga A·chik A·song chasongni
 chasongna.
 Sokko ringa alko du·a songdonggiparangna
 Ong·angkuchong nang·ni bimung A·chik
 A·song rasong,
 Nabakuchong A·chik songo mandesalni chasong.

—Harendra W. Marak.

12. SENGWAT

Walo ramako a·bimanduni
Re·angmitingo saksan,
Mamung ku·rang gri do' aro matni,
Salgio jajongsan.

Nika balna moenggipa
Bol bijakrangko,
Chipakore baksa ning·o
Jajong chrokako.

Burungo bol sambibalni
Simila biba,
Balwa baksa kalgrikani
Ku...ku...ba.
Re·enga dongdikgija
Chanchie, chanchie.

Mikkang, mikkang ching·chetgipa
Gita wal·misirang,
Mikjapanti chelangenga,
Knajake ku·rang.

Sing·atode agangenma ?
Talate an tangko.
Sawa mancha, wa·al ong·ja,
Ching·ata maiko ?

Bangbango gitchogipa
Jajong askirang.
Ong·jakonchim seng·atgipa
A·sako na·mang.

“Angara a·sako chagipa samdim
Boldimo dongaba,”

Salgio ching-gipa jajong,
Askirang ong-jaoba"
"Donaha jeko jekai
An-tang dakgiminna,
Dakna nanga chongipa ong-e,
Chongipa skana."

—*Kosan G. Momin*

13. PANGIPA SONG.

An-senga indonga song namen
Nitoa bibalrang ;
Gapa cheksianti bibal bitean,
Sokja gipinrang.

Wa-ge grim grim songko
Nikata niwato ;
Man-gen mamanti biteko
Gitimona napo.

Sila jeni a-barango
Mirang kolgape ;
Bang-a ringrang ghaŋo
Badingna chobae.

Chisamni daapo me-ka, besual,
Wachini badeo ;
A-ba gimik sonan bibal
A-ran sokbao.

Rasin, alu, kobj, mula,
Aro bilati baring ;
Nina nitoriri duula,
Ge·ani riting.

Nokkingo wata akkaru, laua,
Bandalo mi, misi ;
Man·a jalik baring altua,
Bario pan sasi.

Pra pra paroa aro do·orang
Ramao roama ;
Jikjak jikjak do·rajarang
Wario cha·ama.

Nokantio ba·ra daka
Halni gam·arang ;
Nina gitik kasrokata
Kerka jontor ku·rang.

Gue, narikol, te·brong, te·ga·chu
Dilja cha·na ;
Gitim gimik sorok gitcham ;
Nama re·e rona.

Gisim gitchak, simchi rekbak,
Jilani matchurang ;
Cha·amrima jakni jak
Songni matrang.

—*Kosan G. Momin.*

14. WACHIMITING

Bengal sagal biba
Monsoon balwachi ra·baa,
Aram sokpekode ;
Niri dikkol dikkol,
Surma nonga mikkol,
Simandala a·gilsakde.

Bri jita jita,
Gire kata kata,
Niksoa uarangko ;
Mikkani gam·a
Matchama rana
Knara ku·rangko.

Ki·sang bojeng bojeng,
Noka jama so·jeng,
Ritchenga chanchio ;
Ga·akdapsu dapsu,
Balpake man·angsu,
Nikmana an·tangko.

Salo salko nikja,
Walo jajong teng·ja,
Aram simdapani ;
Mikka a·ki, a·ki,
Balwa ka·chi, ka·chi,
Satpake waani.

A·ranode chimikan tipja,
Chibisiko timati bita,
Chiringrangba ;
Batna amjasusu,
Sripe sisu, sisu,
Chiabik dal·aba.

Salakim salbarim gri,
Niato nika mri mri
Daka biaprangba ;
Mongma rosu rosu,
Matcha dongsu dongsu,
Kenpila unaba.

Burung grim andala,
Chi toktakrang bang'a
Bolgrim chatao ;
Rama miksrang dika,
Agal gongmrika,
Re·ani ramao.

Walsim, salsim,
Andalsimsim,
Mikka wasimsima,
Chiring chikare chikonga,
soa sima skonga,
A·dram pijeldima.

Dram suak suake,
Bola wa'a pangpike,
Bana chibimarang ;
Bolgisi, wa·gisi, samcheng
Man·anga bojeng, bojeng.
Chi kamachi u'rang.

Noksam, nokgil nokkrarang,
Dikpripa samsirang
Chi gitang soek-sochek ;
Songsul noksaona
Repana, ropana.
Rama doba dapekbek.

15. RANDI MECHIKNI SINTEA.

Mama ada gri
Sing-e sane on-pana ;
Dongja nio sari
Nape a-jak gampana.

Nok jamdap busru
Mikka wachi jokan ;
Gana kancha chotchru.
Katwenwene chakan.

Gana simpak busru
Ja-ping samsa gala ;
Kanchasru biritchu
Omakchisa nala.

Chudapsiko samsa wa'al
Samsa pine simak ;
Pile pile walni wal
Tua wal seng-kap.

Koksrong ki-sang napong
Sawa kotapkuna ;
Jakkala bipong be-tong
Sawa date on-kuna.

Balwa balmanduri salo
Sao napsikpakuna ?
Matcha elbikani walo
Sawa rike galkuna,

Dongja lau chi ko-na
Wa-sing sotgalaosa,
Ko-e nanga oldona
Am-bol kokchalosa.

Me·dik be·korangaosa
Rite cha·a me·bitchu,
Mi cha·na man·jaesa
Rikgok naa guasu.

Jinman' cha·che galako
Walsimsimo ikwake,
Tepe tepe dikplako
Cha·paejok ok gape.

Sinti dopilgimari
Salko salniatainok,
Nini bambanengari
Walko walsengatainok.

Gana simpak bol bigil
Ganpaachime ;
Tangengode ang' Rimil
Baang napjachime.

Angse siming simingan
Andaljok agilsakde ;
Mikchi wari jokan
Tipjaha angnade.

Maina wate katanga
Apa sagi na·ara ?
Maine ba·e donanga
Ama angkoara ?

Indaka duknasa
Ang' rasong kalkame ;
Maina ra·onasa
Kambe dotekmie ?

Him ! anga da·asal

Rasong gri korbonjok,
Angse sia intal

Duk ango onchongjok.
Oh, angni Babira,
Nipabo ang dukko,
Ong-jaode tappira
Pilatboha angko.

—*M. Rongmity.*

16. GOLAP BIBAL

Nitoriri niwata da-sipring
Ripamchiko ringope ka-dingjok
Simildingding bibako rang-spejok
Bal balpakbaode angna jringjring !

Wakidik dake gipin bibalrang
Niengaha nangkon mikketchichi,
Mepliprang nangkon nitobataton,
"Bipango bu-su," inengjok u'rang.

Sagalon ku-chil-rinok balwa
Repak-oppak dake nang' bibako
Ku-dimpakangjok angni mikkangko
Nangko nitaitaigija dongknajawa.

Ah ! Salgra repaksrapgijan Na'de
Kusimtekengjokma Golap Bibal ?
Rangsitakuengaba daldal
Da-sipring gitan bal-ripeng man-e.

Ka-dingwachek rona sikjajokkon
Nionengaha uisamsoe ;

Somoini dikdik neng-takpaode
Da-nang ka-dingsmiten donggenchimkon !

Ritimkaria dikdiksanasan
Mikbua gnang nangko watatama ?
Mesoksusuna ku-rachakba' ma
Nikna gitik dake rurongnasan ?

Rurongang' Golap, ritimkarinaba
Balmung mesaani bonningaigen,
Rinok tangsekoba rimitaigen,
Dabijawamasa Sinkarinaba ?

Rurongang' Golap, ching, mandeba
Nanggitan-balani dikdiksasan.
Jringjrotmung too ong-ja mikjapsaan,
Janggi donga inc rasong dakoba.

Pringni chingchetchet ripamchi gita
Bal sul nanganan ran'a ching' anchi.
Somoian gualgija dikdikanti
Janggi tangako chankamaienga.

Ah, basakoba ching tangmitingo
Maikoba deritchuna dakangna
Saoba abachengon, donangna
Nanggitikjok chusokkan ja-mano !

Rurongang' Golap, rurongang a-sal
Smilchip, Nanggitanan sengsogen ;
Sinkarin' ja-mano balbataigen
Smilbajawama Ritimkarin' bal ?

Rurong' Golap dikdixsanade
 A'sakko Na'a nitobatadjok.
 Bibako mandena rohiatkunok.
 Angaba nanggita ong-paode !

17. HOBANI SINTEANI

Angsu nang' brangbaana
 Didiksa janggin' songo,
 Ang' mikron sripanga
 Gisik ra'an' wario—
 Andalsimsim bol gita
 Ang' pap a'ko gripdapa,
 Nanga sian' biteko.

Eden barin' boldimrang
 Adam baksa sildima ;
 Similding kubibarang
 Chingna rinok balgaoa.
 Bibal, bite, chokchimchim
 Janggin' bolba chingninchim,
 Tipchanggija Barin' suk !

Boljanggini salakim
 Balwa balsri balao,
 Ka-ding-wachek roachim
 Teng'an' tensudapao ;
 Bak sokbagalgalejok
 Chipu ka-dingsmitejok
 Ka-dingsmitchakmanaijok.

Jechakmangmangpabochim
Me·chik surin' kattako,
Teng·a on·pakugenchim
Nangna barin' seng·ako,
Angko kema ka·jaoba
Adam, anga saksaan
Sinti niniaigenchim !

Himangai, angasa
Patjok saoko m·echiko ;
Gipin ong·ja Hobasa
Almanaljok biteko !
Angni Ripeng Chamena,
Kasa' angse, Adamna,
Dingol·gramchin' bolniko !

Angni gisik bilgriko
Teng a uijajokma ?
Dake·nina sikningako
Dontele sao on·ama ?
Mainan ge·a uijajok ;
Da·o sieteanisa ong·jok ;
Anga me·chik mangmangchim !

Changsa gatuatmanon
Chel·e ga·akonanga ;
Beng·a bite cha·aon.
Be·en gisik matenga.
Kniding dingsao tangaijok ;
Abel a·a pilangjok ;
Ma·an' ka·a rakgenma ?

Dongspa dede Kainba
 Dagi man'e brangangjok ;
 Sese Adam, nang-paba
 Okna bolma pe engjok.
 Kama, sin'a minggija,
 Neng'a, mata, donggija,
 Sianinan neng-engjok.

Aiao chingon bonosamung
 Changsa ga-tuatan bal !
 Chingo krae nangmung nangmung
 Napkampaosa saoni sal !
 Da-onaba angde angsu
 Malamenga sisu sisu,
 O, angni papni a-sel.

Papni a-sel chongao
 Siltokenga ta-marang
 Mikchin' kurang jangao
 Tusidimua do marang
 Salni ja-dil kamsraka ;
 Do-reng skal chapaka,
 O, ANGNI PAPNI ASEL.

—*Evelyn R. Marak.*

18. A-CHIK KU-RANG.

Miko, Dokua, A-chikni Ku-rang !
 Inchakpachong a-bri a-kong.
 Mesok' Doraja, A-chikni Bimang
 Nitoana mikchapachong.
 Ring-bo Do-kua, A-chikni Ku-rang,
 A-chikni Bimang, A-chikni Rasong !

Darang do·an ku·tangkosan
 Knatonikbata ina :
 Bolgrim rong·grim, do·jinma grim
 Do·rajamung a·dingpaa :
 Dokoreni wakwakana
 Dare chiring rongkuchaka.

Ku·chakboda, pante metra,
 Inchroboda A·chik Songna !
 Dakru nosan' maringan
 'Bri gitim ka·a moa :
 Salgran' wa·al natbaa·na
 Do·regipu gisikosa.

'Ku·onboda, me·tra pante !
 Ring·paboda...ku·grimade ?
 Da·ken beben' teng·suana—
 Do·bakrangsa nichakman·ja.
 Walni jo·ong mepilipan
 Chakiona bilpinnapa.

Walo aski so·tokode—
 Hajal hajal, ringrang ringrang—
 Salgi a·sak maatgija,
 Sakni Matma Ja·ko] toe
 Seng·wat wa·al so·ritinga
 Nengnang nengnang bilrroe.

Chakat, A·chik me·a-me·chik !
 Seng·aona ong·katboha ;
 Sko de·doe, mik' songdoe
 Kenmangija nichaoboha.
 Bidani bilchamko nate
 Sorikrikna, pante me·tra.

Duramani ja·paoni
 Me·mang mesal cha·ramona.
 Kang·kare kae, watatna hae
 Jajong Kadoramonaba,
 Susimeni mikkang minge
 Jatengana matduchina.

Salgirani teng·a ine
 Metongbolo niselchina—
 Abong Rajan' a damoba
 Mikbrape mikgil ga·ochina ;
 Snilchimda, pante me·tra !
 Wa'lgirigipa ja·rebae.

Wa'lbimao sobakchina :
 Goeran' milap ilapilap,
 Mikka simo riprapriprap
 Askı chacha chanmangija—
 Nokrek salgi totaoni
 Simsang-chigrik pakramona—

Mikandala A·chik Songna
 Bidan' wa·al ching·chipchina !
 Chipat, A·chik me·a me·chik,
 Bidan' gunko gingsikchina ;
 Rajasimla noksikoni
 Dobakkol kolkumangona !

Spoat, bidan' kubibako
 Balsiri Batpakramona !
 Me·mang songni chigaoba
 Simildingding ringsochina,
 Watat, bidan kubibako.
 Muni nange tusigipa

Bal·girani bal·prongako
 Rang·sitmane mikselchina !
 Mongnal ganda nitoriri—
 Nikatman·a mikjumangchi—
 Mite·Sa·gre watmatgija
 A·chik A·song balgaochina.

Miko' Dokua, A·chikni Ku·rang,
 Inchakpachong a·bri a kong.
 Mesok' Do·raja, A·chikni Bimang,
 Nitoana mikchapachong.
 Ring·bo Do·kua, A·chikni Ku·rang,
 A·chikni Bimang, A·chikni Rasong.

—H. D. Momin.

19. SIGIMIN RIPENGKO GISIK RA·ANI

1. Sandia manderangde kilkok desusue,
 Aganna uamangde atte pari nie ;
 Ringpajawa angade chijamang chimikko,
 Chaatjawa nang·kode sbamgual jadilko.
2. Re·chakatjok atipsanni salaram bidingni,
 Ringnokma balgarini dringo gaari,
 Brangrimjok jawa songchi bidyani grimna,
 Silang a·chu ja·kol sanne bisikona sokna.

3. Amjaoba bika ranna Jappa Jalimpa mung,
Manjaoba chela sinna Suppa Bonggepa mung,
Sikpana rejak dikil immao sosigija,
Krangpana chatta awe chako balmitgija.
4. Hoho balwa mongsu rake stil ginchi ono,
Doma kinma awawerang rama brangtoko,
Rema gita jakbingna, ketcha gita toprimna,
Nokap tesok wegattatna dilleng diltikpana.
5. Sabo sarang bisi bijong' Marakma morokjok,
Detangkode nirokigija cha'e siataijok.
Nima Goka, Sasok Jada nie dongaijok,
Bisik Bikrom, Saljong Mite bao dongnu-
tokjok.
6. Beksagre nangdinga bolchu a-ding chasronga,
Mite sakni dinbara salaramni adapna,
Jeonin brangaha bidan chimikona,
Apilaha sokpile rechutang anramna.
7. Korabok Koramin, Dakdame Rudame,
Bagramaijok chigramaijok indin sitengtoe,
Aio ! Rongchi Dalmang, Rongdan Salmang,
Salchidokna waalo angjok kasagija namang.
8. Indigita salrangna cha-gija ringgija,
Walba tusija, danang, salba salnapja,
Masia ! bitena gee bibalo aka,
Nisengaijok kadonggrame rakarini salna.
9. Indioba janggi silchi manne katchi-rangsi,
Nikatenga pillakon kamrangko jatangni,
Dongkamha chol nangan nikame Isolkon,
Mikchin to ja-o nonge bichakna. Uon

10. Kadimea indakesa chanchie bewale,
Isol nangko dilbahaoba chirue a-gate.
Uni kamna jatko dilna silchi sikmitingon,
Jasokgija janggi galjok abakutangon.
11. Isolni on-gimin nambata salrango
Nangni nikjumangrang gimaja bangbango,
Gitel je gital janggi patiaha nangna,
Tengsubatagil sakni pilak suk rasongna.

—K. R. Murak.

20. DO KUA

Koribok balbajok me-gong karitang sokana,
Sin-jrimjrim ka-sina balwa salgroni balana.
Gnanggipa tarisoa sin-batbaengana,
Sintienga kangalgipa an-tang manderangna.

Boksoriri, nitoriri mesarani bala,
Ka-dongsoa gnanggipa sengna amjapila.
A-bri a-kong jasengbao ningjoljol niksenga,
Guuri asari mitmat anga nikjaenga.

Pangna mikoronga do-ni mikoa kuranga
Walo janga ku-rang gita knakamaienga ;
Nachikola uarangko knatojanika,
Knatoa kurangkosa knatimna sika.

Mikoda, Dokua na-a ringsningpaena,
Knatonikbea anga nangni mikoana.
Nang' kurangna badeaba banoba dongama ?
Sonabal, meseke, Chitmang, Simsang jarimona ?

Mokma akuang bon·e, Nokrekni ja·rimona,
 Rikkit rikkit am·obani sokna dongkuama ?
 A·bri mikkim chaatgipa bol chua chuao
 Ba·e a·ding a·dingpachong, Jange nang' ku·rango.

Sningchong abrin' dedrang ganti chenggari,
 Salchame, dochelu, dorek namen ka·sariri.
 Banoba matchokni bi·sa nike donga gita,
 Mikoda, Dokua na·a rodilenga gita.

Ka·tong saa mikchi rakja chi rita, chi rita,
 Sana aganengamung dukko, grapenga gita,
 Jokenga abrini chi dalgipa chiona,
 Knatoja dare gam·a angni nachikolna.

Indiba chaknapa angna brina ku·rangna ;
 Mikoda, Dokua, na·a knatojolana ;
 Mikka dalmang ; nangni bimang sokja gisimade
 Gun gngangkosa da·nang mingsingronga mande.

Indiba koripokma balgipa me·gongo,
 Bibaliping balenggipa megagong gongao,
 Ong·jaoba, gitchakchipchip mandalo ba·ode,
 Nitonika nie·rona aro mikoode.

Pra pra, jikjak jikjak, sawani, Dokua ?
 Smukambe, bola rike, abri akongoa ?
 A·o roa, mitam mala, mitam sako bila,
 Nio nikbitbata ; anga channa amjapila,

Burung jasengako nike rogi-parangsama ?
 Knatoa kurangnasa nangko ja·rikama ?
 A·gabrike, subalike bolgisini jong·ko
 On·akode nikja anga nangna uarangko.

Dingchikgipa nokol gita jarikako nika,
 Wa·gop, bolgop, smu gop mingja burung dika ;
 Cha·amangjoljole soka chiring chisik a·dok,
 Ja·rikanga mikeako jeona sokangjok.

Sa·gre nokol jarikgipa naugo bang·beoba,
 Alduachi tangarina sikja indioba.
 Re baoba bobilgipa Do·kuaskani,
 Nokol angko dingchengatna donja nisengani.

Tilareng dotileng baksa domandalni jat,
 Srengki, tantika aro dojinmamung mat.
 Grimchi Bacharin dedrang A·chik pagitchamni,
 Nike gisik ra·pachina na·a roamne ?

Ban' songo ba·e chi·e, jelbea indita ?
 Songredila rimbitenba Abing raja gita.
 Bao Habra Husen, baosa Sirampa ?
 Baa bilakgipa ma·grik Jappa Jalimpa ?

A chikrangni ua ripok mingsinggiparang bao ?
 Bao jaktuatbaaha gisik ra·ja da·o.
 Simsakjae gimaatjok man·ja A·chik A·song,
 Dongkua, Dokua, na·ade, chasong chasong.

Nisan inpana dongja A·chikrango chin,
 Nisanko mesoka na·ade antangni kimechin.
 Na·ade, Dokua, basu mukutko stike,
 Dingna gita bilorroa kotokko rimbite.

Bilangbo, Dokua Rani, A·chik a·song, a·song,
 Jarikna changako nike chanchia nabachong.
 Walni askina bate nitobata na·ade,
 Do·dean kratchagen, da·nang Do·kua nangnade.

Bimangchi chonbata, na·a, nitoachibani,
 Bijimao bao nangko ong·ja nikningani.
 Indioba gnangpiti nangchi skiani,
 Gisik ra·o sinteani kamrangkobani.

Ku·rang knatoa, oe rasongba dongronga ;
 Rajaska raja, na·a pangnan dakgrikronga.
 Mikandalpilama na·a gisik rakbeani ?
 Chanchijapilama na·a siani tangani ?

Jakgitel dongani sal nangna saliaha,
 Jensalo mande nangko kimale man aha.
 Jakgitel ong·gipa gisik jakgitelanika,
 Mesokenga a·gilsakna an·tang dakaniko.

Uni gimin mingja na·a wa·ani kachako,
 Ring·atronga ka·sariri skango ring ako,
 Dukni sukni sal nangnaba, Dokua,
 Ring·angbo janggini gitko jeona dongkua.

Tuniram Rongma Marak.

21. NANG·KO GISIK RA·GEN.

Deba nengtakchinaha
 Aman a·an kabako ;
 Salba napnasiaha
 Saliramni kolkumango,

Patbo golap salsarini,
 Un' ka-tongon sikrepchina—
 Ia bibal manchokari
 Salsanaba balgaojaha.

Bolma gita jade'ari
 Nambatama manden' janggi ?
 Giting gita tangbangoba
 Bolgisie ga-akona.


Nitobatgipa mongnalan
 Salnasan bala :
 Similbatgipa golapan
 Walon janggi gala.

Kamal dongjama nangnara
 Adapatna a-an' bimangko ?
 Srik srik chakki so-gijasa
 Tuatama andalengo ?

Natengoba hajal aski
 Nang' mikronna chingchaama ?
 Walgimikan a-an' mikchi
 Tipjaoba mingkugenma ?

Balwani knalko moode
 Rinok rinok ka'a moegenma ?
 Walo douang mikoode
 Kasuangsuang dakpagenma ?

Na'de mikrakpawaha
 Dogisiko ianode :
 Aro aha andaloba
 Tujawaha mikrakode.



Cham·jawaha Jekai chinga
Bilsi brie cham·gen ;
Buchumae nen·gmanjaha
Chingasa bil be·gen.

Pring senobao, attampango
Nangko gisik ra·gen ;
Salo gimae, aski gita
Chingna walo teng·gen.

Knatoa ku·rang jripahaoba
Gisiko sul bingbangrika
Simila bibal sikrepoba
Bibakode gingsikmana.

Salsa bale ga·akone
Balgipinna a·sal onga ;
A·an' kabako ja·dil su·e
Balkario smiltaia.

A·an' bimangko jongpuoba
Janggin' birong .bingbangrikger :
Bibalrangni biba gita
Janggini gun chipe donggen.

Maibade a·sal gita
Banobade skatrikgen,
Nitoriri smildingding
Basak'bade balgaotaigen.

22. RIPOK DO-KATCHI

Andalsim 'bri kabako
Donga song damsas ;
Songjinma ong-paja
Chongipa gittimsa.

Chi-indik chikjrimjrim
Burung a-bimandu :
Bolgrim agrip chigrip
Dikpria er budu.

Attam rona man-ja,
Re-ja burung che-le ;
Do-ga kachiptoka
Jawa dakna kene.

Knaronga randingako
A-a bikgil bikgil
Chikgrikako matchani
Bika katchi bikgil.

Matcha drop mikkang
Nina miksupengpeng,
Ong-katronga ina
Songni salgro-salgipeng.

Aaio aganna dukni
Da-nang, knana misilgni,
Aganoba katta,
Bisong jiksesani.'

A-chik inming inmingan
Ding-ol gramchiesa,
Re-baenga a-ba gampae
Attam salniosa.

Biapna kra kra
Segipa ja·manchake,
Degipako kabak' ba·e
Jikgipa kera ole.

Ku·ma changa gita
Ku·saba aganja,
Muni pua gita
Bi·saba mojekja.

Indioba gisiktango
Chanchie maikoba,
“Hawa gonggeonma.
Hawa balgrimonma.”

‘Srak’ ine gam·ana
‘Wae’ kasuang niate,
‘Tek’ ine ga·akana
An·chisreng nipile.

Attam ka·sinbajok
Sinjrim andalbajok,
Rerudam andalgrip
A·kongko re·engjok.

“Ra·da angkode na·a—
Jawade dakengjok.”
Indinako knae
Jikgipa an·pildatjok.

Do·bisako do·reng gita
Balangjok chringchrap,
Menggotchiko menggo gita
Dakangjok iling ilap.

Bikagri da·nang me·chik
 Detangko gipakkote
 Dongaijok chrikari,
 On·tisaba jriprange.

A·chiko nionjok,
 Se·gipani jakwatgipa
 Millamko koldojok.
 A·kong, a·bri bolgrim,

Chiringrang knachina,
 Salgi aram miterang
 Sakkina nikpachina.
 Chrikwatjok a·gilsakna,

“ANGSEMUNG SINAKA”

NATGRIK GITA MILLIAM ENGE
 ANGSEMUNG BONNAKA.

Do·bima gita gangcheng
 Chapajok setangna,
 Atching bolgisim gita
 Kom·tote sikapana.

Am·paksru mikmrumru
 Nikatjok matchoko,
 An·chi jra jra chikapari
 Nisojok me·chikko.

Sitengtoe ma·amgipa
 Setangko ra·sekna,
 Chasinapjok man·paode
 Bobilko so·otna.

Kena maiko minga
Gisikon najajok,
Sia mai daka
Da nang chanchijajok.

Me-chiksan danang !
Bobil gipaksajok,
“Angsekode, Angsekode”—
Ma-amangajjok !

Agilsakba jripjrang
Pilakchin ongtajjok,
Sakgitamni janggi da-o
Songredimangtokjok.

Aiao, Na-ade me-chik,
Sena janggi galjok,
Saksanmangmang A-chik.
An-chitang rugaljok !

An-tang mikchetkangako
Pe-ja sina kene,
Segipani janggi baksa
Re-angjok joribake.

A-chikrangni mingnamgipa
Ripok Do-katchi ;
A-gilsakni mingsinggipa
Sonani biginchi.

Ripok Do-katchi gitan
Nangkon mingsinganchong ;
Sonan biginchi gita
Nangkon gam-chatnikchong.

A·gilsako dongjahaoba
 Nangna ma·ringkugen'
 Jota mangsirani to gita
 Na·a smilchipgen.

23. TINGTOTSА CHINI GIT

Ka·singipa pringni balwa angko de·mesajok,
 Salaramchi jrang jrang teng·ako nikatjok ;
 Unon anga bewal gita onkatjok rotaina
 Chini samo ka·singipa balwako ringtaina.

Grim giting kabako asonge ro·ongo,
 Jakgitele sukari romiting chachao ;
 Nikatjok rue rue tang baenga dingtanga,
 Ga·akejok soopa jakpao chi totsа.

Songree gisiko am·angjok iako—
 Aram ripamchi tot gri a·sak salgio ;
 Chimit chimit kuchimit terakbalbal nomilsa
 Seokgimin a·sako bibaltang gitasa.

Singejok re·bae, "Na·ara banoni ?"
 Ring·aha gitko ka·sisri an·tangni ;
 Dingtang dingtang dona bimung angko jatanti—
 Indakesa A·chik ku'a minga-de·a 'Chi.'

Dubiaha agilsakko Noani chasongo,
 Hajal gitam ritchasku sotbrisajok da·lo ;
 Ua chini totsasa ong·paachim angaba,
 Tang·doesa koşakchi biba pijok bimangba.

Songree salg'o ga·akjok a·brio
 Chasipjok a·ao nangteke rongbrako ;
 Ro·ongni koltiktik a·kolo ma·chakjok,
 Sokdapoa gipinrang pelsue suakjok.

Indakesa rong·gopjol man·aha joktaina,
Kitgimin mandeni chigao naena ;
Chrok mesaa tim tim gam·esa,
Joktaijok saksele chidare gitasa.

Basakoba bilbila dochirongba pilpila ;
Be·en nama nampaba kongrok kongtok dakpila ;
Chiring bibrasniko nangdimbae daldapjok ;
Jrimitmit jokange songjinmao naejok.

Songjinman' rikamo an·cheng soe dingdingjok,
Kasi bokdim balaba nio pajaririjok ;
Salgron' balwa balsriksrik attam salni ka·sino
Ong·jok kusi darangan rona rikam pangsango.

Basakoba kenbegni ong·jok balwa raka,
Chipakore rompebajok a·bri-dingjol gita ;
Supeonjok' aberujuk Chima adramrangba,
Gitcham pangma kongsi nanga dongjaha darangnaba

A·gipiko suange bolrangko bilangjok,
Chichangatna bibrao bilsianti danejok ;
Bola wa·a chapiljok samsi sampal a·kae
Aro uko pe taijok changgipino pil·taie.

Chipil bana banbae ripjok a·ga a·dingko
Ripikkning dakangjok da·nang ge·a gamako ;
Mia misi pandilba adubeko gitchujok,
Mat mese gorittek bolo wa·orarajok.

Ritcha ritcha jangrangko dolong aro songrangko
Jokpakbae sokejok songdongena sagalo ;
Gri ua biapo nikja bimang a·gani
Chipakkore gam·asa ripengaijok balwani.

Nipilato janggilchiko batbagimin salko,
 Nama suk, namja duknikjok agilsako ;
 Chanchiatbo O mande, nang janggi tangao
 Ja ku ga-a sakprakprakan ia obostao.

Kennabe indiba chanchie gisiko,
 Chitotsa janggi gri dakani kamko ;
 Jame jasokgija gisik, dongkama mandesal,
 Batangbo namao a-sakko da-ontal.

24. HAGAR

Ang' songni a-bri rike nina nitoako
 Gisik ra-o, kapak kapak, ka-a suangako,
 Balkasin baljimjee balo me-ga balgraa ;
 Dadinga damana mesao pana doba bara.
 Tairiri bangsini chaana mesara mesara,
 An-senga 'brini rikgeo me ga jimjeara.
 A-ding akuri joljol rona re-angode,
 A-kasina jasengao chadenge niode,
 Maning a matchokni roram bubu dotdruao :
 Drokdrok sadipil do-ni cha-na ga-britramo ;
 Miksik gitchak, gingmat ringrang do-grik cha-amramo ;

Sam smilding mongerako balwa balpakramo.
 Wa-a bandil bandil nina nitoe charamo ;
 Mikron nikbitbate nina sam bibal balramo.
 Mikchi ipakmitingbani bika adram be-e,

Gisik ruekpilgiminba be-en ramsisie,
 Maljuri jamijolgimin wagam chikspata,
 Mikron miksongsala aro peteng bora bita ;
 Da-nang apa, danang atchu danang angse racha,
 Gale re-angna sijokma da-o chacha ?
 Mangtatna kamal kurang salmiting chacha,
 Samjanggi samripeng kano nichaopila mikchra ;
 Mikselpile, niwingwange katchaatpilmanno,
 Ka-sariri kuagane ka-dongatahao,
 Ku-chil kusimtekanani mandal bibal changa jajong
 aram kranga.
 Mikkang rongrimitabani
 Chrokjok, chrokjok, gisik duko sibokgipa,
 Ka-dingsmitsmit ku-chil, ku-rang kandikgipa,
 Ja-chelue asongman-o, ring-ata sreko.
 Ja-pa ga-dik, jakpa mera dakmana gisiko,
 Ua gita nikahaoa, brini nitoako
 An-sengpila okkapila nie uaranko.
 Misor songni rikam nama dram an-sengao,
 Chigisim chigisim ine songna jangangao,
 Mikka wae chi dal-o dram an-chengode,
 Skata bolgisi jeo chini chonangode,
 Ama angko mikkang done kera olatenba,
 Redilanga dimrim dimrim am-bol am-nainenba,
 Nikgenma banoba ua chisam nama gi-a,
 Rikrak rikrak chipakore sona bibal gita.
 Koripok alabok do-ma doancheng jepjepa,
 Tilu kasi tangsek samsi cha-amna namgipa,
 A-kaweo gamgipa manden' a-ani miranga.
 Balni sako balangode gadang gadang changa.
 Samsi mitil, bakra pattal, sam dindokao
 Gitchak, gisim, sinchi rekbak matchu cha-amramo,
 Rakkual nitime uko tilara sikode,
 Kopa gnang, nachil de-krang, ku-sa cha-manode,

Guale nipilman·a ua gam·ako knae,
 Kolamronga am·bol chinga uarangko nie.
 Niri dikkol mikka simo alabok merao,
 Nina ka·sri, anchisreng kimkoe kimengo,
 Do·de bipa kusi ong·e grang pinbrue,
 Mesao nitima, geok bima bolo ba·e
 Indonga a·selni soko chinga basakoba
 Re·srapgija sket sket nokchi ma·ningsaba
 Katbae nikea noko chapana dongako.
 Rajan' cha·a ong·jaoba kangal cha·aniko,
 O, nitoa song nama, ang' Misor a·song,
 Gisik ra·atake anga jeoba dong.
 Ama apan' nok namja, indioba angni,
 Nitonika nie rona songsul nokripengni ;
 Da·o anga Giteltangni noko dengjawaha,
 Songchina repileba bano biap mangenaha ?
 Songchina re·angoba, ma·ani salakkim salbirim,
 Man·panan ka·dongjaha jena ka·dongachim ;
 Una minga chengo angni giteltang Sarani
 Duk on·o chaktogija songtanchi katani
 Salo, rama samo angko Shurni bakrao,
 Chijimjim chi ka·sina chianing sambao,
 Gronge Isolni sagre ingipa patie.
 "Hagar" Hagar, na·a da·o baoni katbae,
 Re·naka bachina ? Na·a nokchina re·pilbo,
 Nang' giteltang Sarako manie dongkubo,
 Knabo, knabo, nang·na jeko patiani
 Dongenga mikkangchi suk ongangani ;
 Anga nangni bitchriko dingtangmancha dakgen.
 Bang ejelbeani gimin channa amjapilgen.
 Songdonge 'brini sako nikao pilakni,
 Ong·pilgen changsade ua jatna kenani.
 Da·o, na·a oko chango kea gnangpiti,
 Indiode mainasa na·a katengpiti ?

Uako neng·mano, na·a uko Ismil mingbo,
 Gisik an senge name bi·sako aldubo,"
 Indine ingipa angna agana katako.
 Manie dongkuna anga uni ku·chakako
 Ang' gitel Abrahama bebeo ka·donge.
 Toromi, rasong, gam patiako man·e,
 Bilakroroaha aro mingsinga man·aha.
 Angko Isol indakgipa noko doneaha.
 Anga nokkol mechikoba bitchriko jelatna,
 Je Isol dukni salo mangsonga dakchakna,
 Ua Isolko wate an·tang songtangchina,
 Mitchia miteko bame olakkipitaina
 Re·jawa, re·jawa song·chi ine inobani,
 Ma·a gita songtang angna gisik ong·obani,
 Dukni sagal chipakore ang' ringatangko
 Brangoba kapakoba amchakpilgijako,
 Tanggitik me·chik alna branggipa gita.

Grapaha Hagar da·nang, mikchi sona gita,
 Salni ga·su pettangrako, neng·a su·sikime
 Pil·bae, dilbae deko, salakkimko am·e,
 Pilakchin a·rang a·dang, nina sri sri
 Salakimko man·kunama dingolasa bisi.
 Gri do·anjek mejeka, gri mikoa do·kuni,
 Salchugragraoba dongja mikoa huroni.

Pangna jaku chanronggipa salchame, do·kurok,
 Mai bolo ba·enba da·nang mikognok ?
 Jena anga pangna gose gisik ka·sroka,
 Knatori ka·sariri bano mikonaka ?
 Katang, katang gose angko galenba,
 Pangna ong·ronga salni nitoarigipa.
 "Angade sona daldiko duko galenasa."
 "Chu·sokjok, chu·sokjok, angni manigijanisa."

Indake chanchie re-e nichaora,
 Sepango nikaha ua dimrima bolkoa.
 "Iakae, sengsoenga, donsoa nang' dena,"
 Iana gita, jipjang jipjang moenga balwana ;
 Asongaha salakkimo deko ka-bak done,
 Chi gnang mosokniko jakasichi on-e.
 Katome rabita pita skango cha-ako
 On-aha jakrachi dena ua cha-aniko.
 Salakima ka-sinoba ua be-enasa
 Salakimatpaenggen ka-tongni duknasa ?
 Be-en ka-sinoba da-nang dukde gimajaha,
 Niwate nikoa songko grapna nangaha :
 Greja ripamchi jeni mikron burungni.
 Rurongpaja pangnajolna mikka balwani,
 Duk kalima aro rama re-baani.
 Skangni mikkangde da-nang donkugen baoni ?
 Deni janggilchi mikchi ipake, ipake.
 On-atenga jaksamsachi okkurio done.
 Indjoba tingtotsade detangni be-eno
 Bombom ga-akdapjok on-atpamitingo.
 Rang-san nipile ua ka-sariri dake,
 "Ai, ai angni songna anga ka-pake,
 Ong-jaoba mikkanchini duknasa ba-bae.
 Grapengajama ? Na-a nokchina repilna, hai,"
 Gipake ku-dime deko, hikhikari grape,
 Ku-rang tang-sokgija dake knichi pindape,
 "Angna ong-ja angde angade nang-nasa."
 "Galnasijok duko anga ine chanchiesa."
 Ang' gitel Abrahamni nokchina re-ange,
 Dositangko ku-rachake olakieode,
 Nokde nokchaksogenkonchim, indjoba angna
 Mai rasongko man-e anga ka-a dongtokuna ?

Na·an dejakra gita ong·ade ong·para,
 De nokkolsa, Ismail, man·rikgnikoa
 Na·ade man·jawa, angde, man·gen Ishaksa.

Uasa de chong·mot ine on·genkon unasa.
 Indake ong·genode anga mai mikgilchi
 Re·angpillkugende dongna uani nokchi.
 Uandake na·simangni golmal ong·gniko
 Nikenba arikatjok, Ismail an·chingko
 Isolni namnika jeba ong·china an·chingba.
 “Me·chik suri kangal ong·a brang sretchina”
 “Man·chong angni gamko, songo dongengode,
 Nikchina a·nama gamna bolgrimarikode
 A·briari song dongna, angasan name dong,
 Jakgitokko krenggnok, anga rakbakuchong.
 Aldue dalatjok angko dingdinge ku·dimjok,
 Name ba·jok, ama na·a neng·e kokdok kokdok,
 Nangkua okkana angna man·gen baoniko ?
 Du·e, on·e dongspako cha·pana ja·mano,
 Okkaeba, okkajaeba, ong·nika giminko,
 An·tang okna cha·kurapna kangalari gita,
 Saan salo sana angko dongtime badita.”
 Unikoa ong·kataha re·na ramatangko,
 Mikkangchi dakanggipa Beersheba bakrako.

Salni saljatchiko bate on·tisa rejito,
 Ka·sinkala salni ding·a be·enko ka·sinato.
 Indioba, re·gipa mande ramakso re·ode,
 Chakna amgenmade ua ringna ikakode.
 Una minga pangnan noko donganigiminde
 Amchakpajaenggen danang bi·sa Ismaelde.
 Adita neng·taksani ramako re·angon,
 “Ai, ai, chi ringna gitok ran·a” inon.

Bi-taiengjok bi-sa ma-ko nipilatenba,
 Mikkang mikgitchake, gramchi singsolenba ;
 Changsa ringahaode chi bon-ok mosokoni,
 Ringtaina am-paoba ua man-kugen baoni ?
 Apala a-gisi ua Beersheba bakrao,
 Ban' chiko man-pakugen samsian siengo.
 Saljadare roramara rikraka chi gita,
 Guale re-gipa rama brange sreta.
 Indonga biapo me-chik maiko dakna ama ?
 Me-asaan sina nanga bilakkugnima ?
 Bon-aha mosokoni chi ringtaion changsa,
 Am-aijok mosokkode galangarinasa.
 Indiba banoba chi gnangode ko-na
 Ra-bitenga jakbitenga ua depantena.
 Ma-ani mikkango dongechina ka-oksie,
 Saljadare nikatao chi ine chanchie
 Daariangnasa bia ma-ani ge-etako,
 "Ong-ja angde, ong-ja" ine bengata uako.
 Isolni ka-sara bang-a gisiko chanchie,
 Ka-a rim-tomari Hagar peo mikchi rue.
 Salmangguri dongpengoba teng-sua dongkua,
 Jajong nawang minokoba samsade nikkua.
 Indiba, Isolna agre gisikni dal-ako
 Pindapa, nisokna amja je ning-tuako.
 Ua manden' gisikbani dongpaa Hagaro,
 Gualpa-ja da-nang me-chik indonga a-selo.
 Maio ka-dongchakpakugen jarikangpanasa
 Nangaijok ja manode dena kalimesa.
 Songchakjajok ka-tong nina deni siako
 Nikjachong mikgronnaba ua a-ao ga-akako
 Jedakeba da-asalon sigen ang' deara
 Maiko dakpakugen, gose, anga niaria.

Deni sambaoni kata kore chaa gita,
 Tang-soka chrini bra chelao badita.
 Ka-sokja indiba da-nang deko nikpilgija,
 Gualsrange katangnade ka-saningpaja.
 Chake an-tang mikrono detangni mikkango
 Mikkanggrike hikhikari galaha mikchiko.
 "O, Isol ia salo nang-ni nokol me-chik
 Bi-paa, nikengai na-a bano angni gisik.
 Jokatpabo, Gitel, angko sagal apalao,
 Ku-rachaka gita nang-ni skango bakrao."
 Knaa salgio ua ka-sagipa Isol,
 Skime, grapenggipa an-tang me-chik nokol.
 "Hagar, Hagar, Hagar," okama salgio
 "Mai ong-aljok na-a rimpilbo ka-bako."
 Man-pilaha una bate agana dongjaha,
 Skang gitan una gam da-o ong-pilaha.
 Chakate Soarchi re-e songdong a-chaena,
 Gnang grioba ua ka-sroka Isolna.
 Ripamchi sonan bibal pring seng bapa,
 Saporiri, nitoriri 'bri niwattoa,
 Boksoriri, gitchak, gisim bibalni balarang,
 Dimrim, dimrim nitoata a'ani boldimrang.
 Re-pana sikama, ripeng, ua bakraona,
 Dukni ari bademano suk ong-ramona?
 Da-atam ka-srokoba knal sal sokode,
 Duknirara mikchirera ong-pilgen uode.
 Indake manderangna salanti re-enga;
 Salko nie kam ka-na je mandean changa;
 Uasa an-tangna nama cholko man-para,
 Ong-jaode ramagimik ong-gen duknina-a,

—*Tuniram Rongma Marak.*

25. NEPOLEONNI KATTA

1. Ianjokma bonkamgipa angni dukni salrang ;
Dongjahama on-tisaba kusi ong-anirang ;
Bonahama chol angna niktaina songtangko
Jeo donge ama angko ba'e dalatramko.
2. Namjaoba angni ma'a mikkang sonanichim ;
Na'a angko ka sabee ba'e dalatachim ;
Jachiking salchikingna oko chongo ke e
Saknae sitengtoe ama dukko chake.
3. Indioba ka-donsoa deko mikkang nikna ;
Deko nike kusi ong'e ka-dimepiltaina ;
Gipinrangna nitobea mikkang ong-jaoba
Sona rongsa gita nika amara indiba.
4. Badigita ama angko dingdinge ku-dime
Ba'e dalataha gose sokane aldue ;
Ka-dongachim ama angna gisiko mangsonge,
Dukni salo dakchakpagen ma-ana ka-sae.
5. Kurang kasaririchisa angko okamachim,
Kabaktango rime angna skie on-rongachim ;
Indioba da-asalsa indaka biapo.
Dongna nangjok gose anga chongipa chichango.
6. Knakuna man-kugenma ama nang' kurangko,
Napoleon The Great ine ka-sae okamako ;
Dukko chake na'a angko bagramaiahama,
Indaka dukcnasa Isol seokjokma.
7. Buchumachibarara deni man-giminko cha-na
Ka-donggramajahama ama na-ade angna ;
Oh ! angni France a-song angni sipai kotok,
Na-simangko dilangkuna cholan ong-jajok.

8. Watgaljokma na·simangba ia dukni salo,
Naljokachim na·simangko ia duknirangko ;
Europeni bilakgipa pilak Rajarangni
Jringjrotna bobil angni Engrajirangni.
9. Minoktokna France songko u'amang am-mitingo
Singho gita chikna dake u'mang timitingo ;
Naljokachim angni songko u'mang jakoniko,
Bonatachim achak gita an-tang bobilrangko.
10. Una agre ma·maanti songni namgnirang,
Dakpaachim namitingo jatni chugnirang ;
Raijoko bariatna songko an·sengatna,
Dakpaachim kusi ong-na songko nitoatna.
11. Amjaoba bamatangna a·gilsak gimikko,
Man·paachim songnokkode a·ani samsako,
Ang bimungko knaarin angna kentokachim,
Napoleon, The Great ine angko mingsingachim.
12. Mangsongachim pilak jatni jakgitel ong·ana
Gipin jatni nokol ong·e dukko man·jachina ;
Indioba uitokja angni mangsongako,
Chanchigija bobil daka pilak jatan angko.
13. Oh ! angni Senapoti Disai Misona.
Na·simangni jakon da·on songko dilangkuna ;
Aro angni Senapoti Murate Muchuna,
Watgaljokma na·simangba angko dongjachina.
14. Una agre angi pilak sipaini pamongrang,
Dakgrikao a·songtango janggi sigiparang ;
Amjawake gualnade anga nasimangko,
Ka·sabea angni ripeng pilak sipairangko.

15. Chanchiaha Napoleon ka-tong rangspite,
Illeng pilleng dongtogija biaptango tue ;
Ampajaha ua bilan chakatna asongna,
Biaptango tuarisa sengsoe siana.
16. Jena anga ka-saachim angni jikgipana,
Gualgenma janggi' ripeng Rani Josephinna ;
Baoniko man-gen gose nang' gita ripengko,
Tipchanggiija ka-tong angni ka-saani chimikko.
17. Ka-sagija dake anga nang-ko watahaoba,
Gualangja anga nang-ko siangnasioba ;
Himangai da-asalsa nang-ko watbaesa,
Dukko man'e dongna nangjok ia biaposa.
18. Dukni sukni salo na'a angko dakchakachim,
Darangniba ong-ja na'a angni Josephinchim ;
Nangja angna sona muta Rajan' singhasonko
Nammitingo angni man'a pilak gamrangko.
19. Indioba gisik ra'a France a-songko,
Gualjawa siangoba Paris songjinmako ;
Siangona kingking ua dukan bonchangjaha.
Indake sukgrisa salko re-ataha.
20. Salantian niwatata an-tang a-songtangko,
Mikchi jingjeng jingjeng dake chanchia gisiko ;
Chanchoiba nikatjaha an-tang a-songtangko
Ka-sabea jik dedrang ma-drang baksakako.
21. Bilsi gitam jadokna ua indake,
Tangaijok nenge dike skime ma'ame ;
Dukko man'e ka-tong be'e ua siangaha,
Dukni sagal agilsako ua watangaha.
22. Siangoba okamanga ua Josephinko,
France a-song aro uni ripengskarangko ;
Uni gimin gisik ra'bo uni dakangako,
A'songtangna ka-se uni janggi siangako.

26. PODININI KATTA.

1. Changchichi-na gisik nange mandesalgipana,
Skie ra-na nama nang-na gisik seng-gipana.
Jeni gimin chanchiode ka-tong samsa be a.
Sko choknok a chi bamgop mikchi ga-akpila.
2. Badeangjok ua salrang skang chasongnirang,
Ka-pak ka-pak chanchimana gisik ra-anirang.
Indioba amja gose gualnade uko,
Rajputanni ningo donga Chitor songjinmako.
3. Songjinmani samtangtangchi donga raka killa,
Ro-onchisa kadula ong ja alamala.
Kadulgimin killa ningo namnambea nokrang,
Songjinmako nitoatna baienggipa pulrang.
4. A-bri a-patal daka niwatna pilakkon,
Nina nitobcesa rikjok ua Chitor songko.
Be-enko kasinatna balwa balsrisri
Jipjang jipjang bolni bijak ka-tong kasariri.
5. Gingsikmano okapila bibalni simila,
Songjinmao nikna man-gon pul barirara.
Chibimaba dilsa joka ua songjinmao,
Ua songan an-sengbata Rajputano.
6. Bolni bijak cheksirango do-orang asonge,
Kurang sale ranga u-rang namen knatoe.
Do-orangni giseponi Khukul mingsingbata,
Etalachin manderangni gisikko salbata.
7. Uandake badigita sako bilgiparang,
Gitko ringe ka-srokata ma-manti do-orang.
Indaken ua songa namen an-sengbea,
Salantian uno dongna ka-tong kusi ong'a.

8. Ua songo songdongachim mingsinggipa jatrang,
Jatangna ka'sagipa Rajput panterang.
Indine banga mande'n uko mingsingbata,
Hindurangni gisepode u'mang bilakbata.
9. Uamangni rika nokrang aro killarangko,
Maidaka bobil gipin ua songjinmako.
Uni gimin mamungnaba u'mang jajrengman'ja ;
Bobilrangko warachakna kenchakanj dongja.
10. Salantian jikjak ijkjak songjinman' manderang,
Kenmangija rotokenga Rajput panterang.
Salni atamangahaode gureo gakate,
Rotokaia uamangde dakgrikna skie.
11. Ua songo donga saksa mingsinggipa raja,
Sason ka engachim uno Bimsing minggipa.
Rajputanni gisepode uko mingsingbea,
Jikba saksa donga uno namen nitobea.
12. Ua Rajan' jikkoara Podini mingachim,
Nitogipa depanterangba sakbri dongachim,
Indioba nitoade mamung dintangkuja,
Uni bimang metra gitan mikkang rongdimelja.
13. Sea saksa kimakode kima kimja gita,
Dea saksa ba akode nika degri gita.
Kni kasot dimrimrim aro mikkang sonan
chijim,
Rajputni metrarangna uan batokachim.
14. Dal o dal-bregijasa nama terakbalbal,
Wagam kitma bitchil aro kuchil mandal bibal.
Mingsingangjok songgipinna uni nitoako,
Pilak rajan sikpaachm man-tokpana uko.

15. Indioba ua songo napnan man tokjachim,
Rajputni manderangna pilakan kentokachim.
Sipairang hajal hajal donga Bimsingni ningo,
Chakataigen neng mangija u'mang nangan salo.
16. Dingtangmancha raijoko ua sason ka'a,
Pagitchamrangni raiotrangba ukon manitoka.
Indake salni salna umang kusi onge,
Dongtokachim kusi onge songdonge a'chae.
17. Indakmiting salrango saksa Mussalman raja,
Re'baaha Indiaona mamungnaba kenja,
Allaudin minga uko Kabur songonichim,
Channa am pilgija ua sipai rimbaachim.
18. Knapajok uabani Chitor songjinmako,
Nitogipa Bimsingni jik Podiniko.
Mangsongaha Chitor songko ua raseknasa,
So'otenba Bimsingko ua Podinikosa.
19. Re'angenba sokeaha Rajput songona,
Ge'etaha sipairangko tamburangko ping'na.
Biap nama chibimani rikamo pingakosa,
Tamburangko nikaijok bakra dal'gipaosa.
20. Uno donge Allaudin da nang Bimsingna,
Chiti see sing'ataha uni jikko nina.
Chiti poraimano da nang Bimsing Rajaba,
Ka'o nange aganchakjok Allaudinnaba.
21. Jikko nina sikchongmote na'a bi'ahaode
Jiktangkoa mesokgenma sawa goka mande.
Nanga inode anga nang' baksan warachakgen,
On'ja nina ang' jikkode janggian sipilgen.

22. Indine aganchake Mussalman rajana,
Watataha chiti see Allaudin rajana,
Indioba Allaudin kratchaninggija,
Chiti see singattaijok mikgil dongpagija.
23. Mesokjaoba nangni jikko nina mikkang bimang,
Mesokgenma jagringkode janeraomangmang ;
Indioba Bimsingde on-na sikipajachim,
Jikgipasa molmolenba una aganachin.
24. Angni gimin dakrikao janggi sipilaigen,
Aganatbo jagringkode angko nina man'gen.
Uni gimin Bimsingba sikipagijakosa,
Aganatjok nina man'gen jagringmangmang kosa.
25. Uko knae Allaudin namen kusi ong'jok,
Adigita sipairangko rimbite re bajok.
Uko nike Bimsingba mande ra'soaha,
Chokki name asongchina una on'soaha.
26. Mesokaha jikgipako janeran' jagringo,
Nie rojok Allaudin mangsonge gisiko ;
Janerani jagringnan ua mikchaaha,
Man'chongmotnan nanggen nang'ko ine chan-
chiaha.
27. Kusi ong'bee Allaudin aganjok Bimsingna,
Nangni jikko nikjok da'ode nangja mamung
angna.
Indioba changsadeni angni dongramchina,
Re'angpabo nangrimgrikna angni turamchina.
28. Uko knae kusi ong'jok Bimsing Rajaba,
Kurachakjok nangchinan re'anggen angaba.
Changsadeni Bimsingba re'angbebeaha,
Kusi ong'e Allaudin uko rimsoaha.

29. Iadioba uni kusi ong'ani japangde,
Uko rim'na cholkosa dakachim uade.
Ja'manoa Allaudin Bimsingko rim e,
Ja'king teke donataha patok noko chipe.
30. Indaken chu'sokatjok an'tang mangsongako,
Aganatjok Podinina nang' sekode kajok.
Jokjawaha da'ontaltal na'ade angninjok,
Sikpaode kusi ong'e da'on re'babojojok.
31. Sikpaode kusi ong'e an'tangan re'babo,
Re'bajaode draenba rimegen uisobo.
Knasoe Podiniba namen dukko man'jok,
Maiko dakna nanga da'o gisiko chanchijok.
2. Jeba ong bo aganatjok anga nangchi re'gen,
Ang' baksa me'trarangko hajalsa rimanggan.
Indine seataha Mussalman Rajana,
Ka'donga Allaudin anga man'chongmotna.
33. Podinini re'baani sal sokbaahaoa,
Seataha Allaudin an'tang sipairangna.
Similgipa atorrangko tamburango satbo,
Ramarango ba ra ane pulrangko galbo.
34. Kusi ong'e katchae ringe cha'e robo,
Doke dame an'sengtoke na'mangjeba dakbo.
Da'asalde nitogipa Podini sokbagen,
Uko anga kusi ong'e da'o rimchaksogen.
35. Beanbebe Podiniba gureo gakate,
Rimbaaha metrarangko gario chipate.
Indioba u'mangara metrarang ong'jachim,
Ka'donggipa bilakgipa sipairarasachim.
36. Me'chik ganding chindingko gane uamangde,
Taria ba'ra ning'o u'mang tonualrangkode.
Gandapaha niksoenba Allaudin uko,
Rama tong'sao chasoenba ku'dimejok uko.

37. Aganaha anga namen kusi ong'beaha,
Rani asongari na'a dongaiboaha.
Podiniba una da nang aganchakpaaha,
Kenchaknabe da'ontal anga nang ninaha.
38. Indioba changsamangmang angni segipako,
Bano dona mesokpabo Bimsing Rajako.
Sina skang ua angko mikkang nikpachina.
Sina skang grongenba da'o re'bapilna.
39. Allaudin kenchakgija uko watataha,
Podiniba segipaona da nang sokangaha.
Kaa gnang Bimsinga saksan dongengachim.
Dukko man'e mikchi ong'e grape dongengachim.
40. Jikgipako niksoenba ua sing'soaha,
Mai dakna ianona na'a re'baaha.
Podiniba mikchi ong'e da nang aganchakjok,
Allaudin antangona angkode rimbajok.
41. Indioba kenchaknabe jokna chalde donga,
Gure mangni mobaenba Sohis sengsoenga.
Ru-utnabe da'on an'ching bakbakan katnajok,
Kusi ong'e Bimsingba da nang chakatpajok.
42. Tarigimin gurerango uamang gakataha,
Gong-rakbee gurerangko uamang chalaiaha.
Allaudin Podiniko nichaksobeaha,
Antangona pil-bapilgen ine chanchiaha.
43. Indioba Podinide da nang pil-bajok,
Kusi ong'e katchae songtangchi sokangjok.
Nisooba niksojajok Ala Podiniko,
Re'angenba nieaha patok nokoniko.
44. Indioba Podinjko ua nikejaha,
Kae dona Bimsingba uano dongjaha.
Nikjaenba Allaudin ka'onangbeaha,
Ka onange sipairangko ua geetaha.

45. Podiniko man-jaoba gario donggipade,
Batchi kate jokgen bia me'tra hajalsade.
Na-simangni sika gita dakbo uamangko,
Podinini rimbagipa me'tra hajalsako.
46. Uko knae sipairangde kusi ong'tokaha,
Garin' do'garangko oe uamang nitokaka.
Uchiniba me'tra dake tarigiparangba,
Ka'donggipa bilagipa Rajput sipairangba.
47. Sko sotjok tonualchi uamang sakantiko,
Napna do ga omitingo Kabul sipairangko.
Ja'manosa uiaha uamang sipairangsa,
Metra ine chanchiachim uamang togiasa.
48. Ja'manosa uamang garioni ong'kattokjok,
Alla Rajan' sipairangba pilakan chakatjok.
Dolgnian bilongbee uamang dakgrikaha,
Hajal hajal sipairangba siangtokbeaha.
49. Alla Rajan' sipairangde siachin pakmajok,
Rajput sipai hajalsaba saksasan jokaijok.
Iako nike Allaudin ka'onangbeaha,
Ka'onange dukko man'e ua aganaha.
50. Da mo bia Podinini chalakkiko nigen,
Chitor songko pe'kninge seke katsranggen.
Bilagipa Bimsingko dakgrike so'otgen,
Nitogipa Chitor songko pekninge galgen.
51. Indine aganaha wagam chikmijile,
Rimangaha sipairangko an'tang skang dile.
Sipairangni inchroangan mikka kima gita.
Jabirangan moangpila banggria gita.
52. Kengijan mamungnaba Mussalman sipairang,
Mamung gita nikja ua Kabulia jatrang.
Knasojok Bimsingba an'tangko dakgikna,
Re'banga Allaudin Chitor songko pe'na.

53. Tariaha Bimsingba an tang sipairangko,
Kudonggipa bilakgipa Rajput sipairangko,
Chona dal'a pilakkon tarisotokaha,
Dekgrikani a'baona uamang reangaha.

54. Gronggrikjok dolgnin uanon uamang,
Hindu aro Mussalmanrang Raja sakgnjan.
Bilongbee name manchan u'mang dakgrikaha,
Ja'manoa Bimsingkon Alla amangaha.

55. Uko nike Podinide namen dukko man'jok,
A'gilsako dikdiksaba tangnan sikjajok,
Dukko man'e aganatjok songni manderangna,
Nitogipa Chitor songni Hindu me'chikrangna.

56. A songtangna rajottangna na'mang ka'saama ?
Ang' baksa kusi ong'e sina sikpagenma ?
A'songtangni onangako nina sikpajaode,
Ang' gita a'songtangna namang ka'saode.

57. Aganchakjok me'trarangba chinga sina kenja,
A'songtangnni onangako chinga nina sikja.
Nang'ni aganata gita chinga dakna sikgen.
Kusi ong'e a'songtangna chinga janggi
ong'gen.

58. Indaken uamang wa'alni ganchio,
Rani baksa siangaha chokone wa'alo.
Podinide agilskko da'nang watangaha,
Alla rajan' jakoniko jokna man'paaha.

59. Dakgrike amenba kusi ong'beaha,
Bimsingko rimeenba Alla so'otaha.
Neng-mangija killarangko ua pe'tokaha,
Indake Chitor songchi ua napangaha.

60. Re'angenba am'eaha Rajan' nokoniko.
Pilakchikon nikejaha Rani Poniniko :
Podinini siakosa ua nikaijok,
Alla rajan' mangsongade indin ong'aajok.
61. Am'o man'jae ka'o nange songni manderangko,
So'otaha nisiaha Chitor songjinmako,
Namnamgipa nokrangko perurutokaijok,
Sona mite dakrangko pe'kninge galjok.
62. Wa'alrangchi so'e danang ua songjinmako,
Nisiaha nitogipa Chitor songjinmako.
Tapra changpilaha da'nang nitogipanokrang,
Kusi ong'na balatgipa pulni bibalrang.
63. Ka saninggijagipa ka'ting Allaudin,
Gipin jikna mikbokari so'otaha indin.
Nikna man'gen siangachi uni pilak kamko,
Bitetangko man'na nanggen ua sastiko.
64. A'gilsako badigita mikboke dakarang,
Ja'manosa nikna man'gen uni biterang.
Badigita a'gilsako namgijako dako,
Ua mande man'na nanggen antangtangni daka.

27. PA-SIKANI

Jak ja'a gisik katta aroba bilrang
Sakantion donggachime chu'soke uarang ;
Indioba an'tangara mamungba dakgija
Aganronga gipinkosa angade ong'paja.

Saniba komia bil, sanibara bata
Ong'jachim, uachi kam namgija ong'ata ;
Bilakgipa bil gnange dakchina nangako,
Bilgrigipa kraa gita ja'rikchina kamko.

Da'la kamko ka'a aro saobara gama,
 Tangka, paisa banga mitam bi-meba cha'a ;
 An tangtangchi choliako uiahaode,
 Matnangu-gen gipinko maina-sa indide.

Mamungba nangpaja ine an-tangna chanchie,
 An tangni dakgni kamko uima-sigijae ;
 Pa'sikari dongaria mamungba dakgija,
 Sakgipinni dakangako kakket ong nikgija.

28. RARAANI

Grapna-beha na'a
 Dederacha dede, ,
 Indinari maina,
 Makchiko galade ?

Nichaoe niboda,
 Awa salgichiko,
 Aknakenga nang' ada
 Jajong nabaako.

Kusi ong'e, ka-dingnape.
 Ra'e rona man'gen ;
 Jako na'an kal'akkan-de,
 Noko done on-gen.

Re-babo sonan' jajong,
 Ang' deni sepangchi,
 Tipe ka-dimepachina
 Grapani mikchi.

29. NANG-NI JAKO

Gitel, ang' janggi nang-ni jako,
 Rama namjabea, nikja guuri peng'a ;
 Dilbo angko miksonga nisano,
 Sretgija re-na andala ramao.

Gitel, ang' janggi nang ni jako,
 Ka tongni bibal, uan nang-ni pal ;
 Nisigipa jo'ongrangko nisangwalgija,
 Rakkibo Gitel, na'an gimaatgija.

Gitel, ang' janggi nang-ni jako,
 Angni ka'dongani jringrot tom'tomani ;
 Man'jaha, am'oba pilak biaprango,
 Indiba man-na ama bonchanggija nang'o.

Gitel, ang' janggi nang-ni jako,
 Siani jagringo, chadenge kenamo ;
 Janggide nienga, miksonge nangchiko,
 Ka'donge rimsona, sinile jaktangko.

Gitel, ang' janggi nang-ni jako,
 Sokon nang' apo, ka'sroka gisiko ;
 Rasongo katchaa, tom'tomako man'e,
 Ring'gen pangnajol nang-ko mitele.

30. SKIANI.

Bite gnanpipa cheksi pangnan gongdala ;
 Chanchigipa manean' ku-rangpilak salon nom'a.

Ku'o nangmitingo dongja ka'saani gisik ;
 Chakchikbebo amna gita gam'atgija ku'sik.

Ku'antina aganchako jelanga kattade ;
 Jrip dongbo, matnangana, gimaatna sikode.

An·tangni rasongko na·a an·tangan rakkibo ;
 Gangbingode pilak manden, chonnikgen ujbo.
 Namgipa mandeni kamrang gimaja pangnaba ;
 Namgijako aganrikna chasong chasongnaba.
 Sina ong·ja, tangna ine re·baa mandede ;
 Sigija kamkosa dakna nangake indide.
 Re pilgen inesa na·a re·baha a·aona ;
 Donangbo re·baani chinko nike chanchichina.
 A·ona ga·akon na a añ tangsa grapa ;
 Gipin mande nikipade kusa kusi ong·a.
 Re·pilan' saloba nang·na indake ong·china ;
 Katchae ka·dingbo, uno gipin grapchina.

31. NAMGNI GRI.

Rongsa chongipa aski bangbang salgio,
 Ta·chritchit chonbea aram salgi ronggrikao ;
 Simila gri bibal bala bijak pindapao,
 Bimung man·gija nitooba burung diltuao.
 Be·entangko saksele jean chakata,
 Kratgipa Me chik gita an·tangko mesoka ;
 Dingkario jaksamsaman bijak dongpaa,
 Mamungnaba namgni gri indongaranga.
 Saljatchi patalo balminduri bala,
 A·gisi an·chengo uigrikgija baksa gronga ;
 Jumango ka·siksike hikhikari gaapa,
 Mikkango ka·dingeba ka·tongo dukan gapa.
 Waljatchi batanga walo, sikipa bangsirang,
 Sanaba uiata ba okamani ku·rang ;
 Ta·rakao balpakgipa chotgimin bibal
 Gita ong·a uaranga, chanchiani apal.

Songregipa chisamo nadike nigama,
 Somoi grio batna ine kewana okama ;
 Ka·dongama namgni onngen mingsade maiba
 Jena amja basakoba agangenma saoba ?

32. GAMGIPA

Na·an niksokgija sagal apalao
 Chogipa janggini ringko kimkim mangrakoa
 Na·an paa gita chacha a·song gimiko
 Ra·bae on·gipa pilak nangarangko.
 Nang·chin uia aro changa sapaniba
 Man·enga songtangko chuatanikoba.
 Gamanikosa nang·ni bree badinge
 Gipatenga pilakchina malko onsree.
 Bilsio jasamang dongode neng·take
 A·songni mandede tanggenchim maidake ?
 Ku·monganirangba gimagen ma·eke,
 Churoroangani bon·genchim ruronge.
 Dongja a·songo apsan nang gita,
 Pilakni janggiko ripinge tangata.
 Jakgitel gamgipa'n raja saksani,
 An·tangon chu·onga, dongja nangdapani.

33. SENG·WAT

Mikkang mikkang ching·chetgipa
 Gita wal·misirang,
 Mikjapanti chel·angenga,
 Knajake ku·rang.
 Sing·atode agangenma
 Talate an·tangko ?

Sawamancha, wa'a ongja.
 Ching-ata maiko ?
 Bangbango gitchogipa
 Jajong askirang,
 Ongjakonchim seng-atgipa
 A-sako namang.
 "Angara asako chagipa samdim
 Boldimo dongaba ;
 Salgio ching-gipa jajong
 Askirang ongjaoba."
 "Donaha jeko jekai
 An-tang dakgiminna,
 Dakna nanga chongipa ong'e,
 Chongipa skana."

34. SANGKINI

Chidil Wari Kimde A-song Damboni a-jao,
 Wari tu'a daoba donga gimaku-ja uno.
 Saoba saoba agantoka Meenpani ma-ko
 A-ning Muni Sane minga uko ba-gipako
 Mitamrangni aganara A-ning Cheranisa,
 Ba'a ina Sangkiniko Ching Rangsilchisa.
 Cheranide Rangsilchide ba-galwatjok,
 Ma-muride Mamikkimde toknan uijajok.
 A-ning Tokre Me-chikara mikgitchingchi nie,
 Chining Tokje Tirabaan kancha brim chine.
 Nio nitojabe ine Nokma Meenpako,
 Dono krajabe ine Bima Sangkiniko.
 Sona biginchiko aro me-kin bakbitchiko,
 Pul agipbiko aro Chondon Bolwariko.

Am·angaha Tokre Me·chik aning chiningchiko,
 Re·angaha Tokje Tira ragatbana uko.
 Elatchiman' a·song aro Randiniman' chiring,
 Nitotiri bala uno bibalrang baliping.
 Unoniko ra·baesa Tokre Me·chikbani,
 Toka ina, sea ina Tokje Tirabani.
 Meenpako tokna skang Maran A·gipiko
 Tokchengana, sechengana natok chironggiko,
 Channa amjapile donga, ban gen a·gilsako,
 Sawa mancha tokna man·gen indisikchachako.

35. A·SONGTANGNA BI·ANI

Balponggipa sagal an·cheng
 Balna balpekgrike,
 Jena kingking aram baksa
 Apsanja tom·dake.
 Suuri ripamchin tingtotrang
 Apsan nangtinggrike
 Jena kinking pil·ja sagar
 U'rang dalroroe.
 Uona chingni songnok
 Aro uni rasong,
 Bon·changgija tomtomani
 Ong·chong chasong chasong.

36. GUNNI DINGTANGGRIKANI

Sakoni do drang
 Bile rogiparang,
 Ba·e bol cheksio,
 Mikoe mikoe,
 Angchiko niate,

Angna kasrokako
 Eurungni bibalrang,o
 Mikron mikchaarang,
 A·bri a·kaweo bala ;
 Angchina anpile,
 Mikkang ka·dingsike,
 Balna mojimjea,
 Ma·ni ka·saani
 Tona amgijani ;
 Jaktangchi toptopa,
 Rinoka ka·bako,
 So·opa turamo
 Neng·tak' tusiata.

37. MITELANI

An·ching bi sa chongiparang pringo mikrake
 Gitelko mitelna kraa jakkochopjole ;
 Maina Uan amani chelo sokko donte,
 Alduaha atchiantal, janggiko tangate.
 Sal, ja. askirangko Uan dakaha.
 Ka·saachj a·gilsakna mikka waataha ;
 Knatoe do·orangko an·chingna mikoata,
 Similgipa bibalrangko nitoe balata.
 Ringna sikgipana Ua chikoba dakaha,
 Kasingipa balwakoba sako balataha ;
 Ma·a paa, jonga noa pilak ripengrangko,
 Patia mama ada. skigiparangko
 Cha·anj ringani aro rang·site tangani,
 Man aha chu·soke an ching dongjaha nangani
 Agilsako dal batgipa an·ching mandean,
 Mandena dal·datgipa ong·gimin gisikan.

38. AGANME·APAANIRANG

Aganani,

Achak wartok krua,
 Do·bok paga smota.
 Achak kore chaa,
 Wal·ja ga·tingkela
 Alabok na·tok cha·ja
 Ang·kerong chikoa
 Aram gri Goera goa

 A·ran ong·o timati bita,
 Wachi soko aringga chaka
 Atte pari nja
 Kilkok desusaa.
 Attema wacheksinan ga·aka.

 Awawe mala,
 Jongchine jita.
 Balwa a·jakra raka,
 Stil rongmisi ona.
 Brak me gok,
 Busuko bususkachi ota.
 Changsa chipu suode
 Kan·churinaba kena.
 Chiningo ja·ga chaka,
 Okningo wagam chaa
 Chun toke pala,
 Wil·mike bota.
 Deba·gija debra ra·a
 Den·na ino attetang,
 Kimna ino ma·detang
 Do·bisa ma·branga

Mangsongani

— Jokani chol gri

 — Uie daka ong·a
 — Dakmika
 — Rochipa.
 — Chanchisokujao asel
 onga,
 — An·tang amjaoba chak·
 gipa dongo gangbinga

 — Bil sunia ba susaa.
 — Dalgipa chongipachi krat·
 chaatako man·a.

 — Apsanko dakrimpaa,

 — Gro man·a, a·sel ong·a.
 — Iachi uachi daka,
 — Namgijaskachi rim·a.
 — A·sel bademanosa gisik
 raka.

 — Donue daka,

 — Donmitape agana.
 — Daksamsoa

 — Gisik ra·ramram dakaia
 — Dilgipa gri.

- Do·ka mandal ringa — Kragija daka.
 Doko janggil sagija matjanggil
 Ino knachakgija waknachil — Beng'o kango ra·ja.
 Do·ma meraa,
- Angsi maria. — Apsan riting daka.
 Do·po debaa, — Uan uan apsan ongtai-
 Amak cheraa taia.
 Guang nenggra chac chika — Bobil chagopa.
 Do·reng agompa meradapa
 Ja·chingtang bua, grong- — Kam!ango a·sel nanga.
 tang nanga.
- Jakpa doke man·ako Ku- — Altuen man·a aro
 smite gimaata. — altuen gimaa.
 Kalchi rudapa. — Jripata.
 Kamlba namja, — An·tang changjae,
 Anggalba goa. — gipinko pa·sika.
 Kanako nama ina. — Dongsrangijana batede,
 on·tisaba nama
- Kawate kudukila. — Aganpila.
 Ki·na siko ki·gol pe·a — Gitikgitak daka.
 Kolningode angkeba A·sel soko warachaka
 grong sachaka, sinakode
 na·chiba ki : me taptapa
 Ku·chilo bija bitchi, — Nampinika : cha·chipila
 Ka·tongo matcha bisi.
- Ma·a noa ja·dil, Jika·dea — Pangrakania dikdiksani-
 bobil. san.
 Makkre me·gong nima. — Man·jaesa dakja,
 Makkre pari nia. — Jelrooata.
 Ma·a·noa manggol, — Ma·a noa gam·chat-
 nika ;
- Jika·dea ki·gol — Jikadea chonnika.

- Ma-na nona kok, Jikna
dena ok.
- Mat an·chi pila,
Me·dik namjaode,
Miba toja.
Megapna a·ba tua.
Menggo wa·al ra·a.
Mese gol·o jota .
Mia misi ga·gong
Mandeskan saljong.
- Mongmako ga·changbate,
Chibrimo ja·gitota.
Salba raka, Balba bala
Salo ramo ran·ja Chio
su·o talja.
- Silskako silchi sika.
Miskako wanti pua.
Te·gita acharea, Mi
gita pisraa.
Totchaode rong·tean
gijela.
- An·tangna ki·sing gitok
Gipina do·de gitok.
- Songna song chichaa,
Dikilchi walang nika.
Pakma Nachil cha.
Mande mangsonga ?
Isol dingtangata,
- Ma·a noa cha·aninigimin
aro jide dede man·gnini
giminsa sandia
- On·tisako suala.
— Ma·a paa najaode, de-
drangba nampaja.
— Namgni gri.
— Rochipa.
— Jokjatela.
— Pangchakani.
- Dal·gipako ameba
— chongipana tang·pila.
— Ku·sik seja.
— Namatna amgijani.
- Rakako rakdapata.
- Bimiting.
- Joton ka·achi ama.
- An·tangde gipinonikode
— man·na am·a indiba
antangde on·skapaja.
- Jaga, tang·a. Srukmitin
aganoba agangimin.
— kattade gipangaijok.
— An·tgugni mangsonga
— kakketko mantokaigen
ong·ja.

Ching'a inanade, Sona
ong·tokade ong·ja.

— Mikkang ba kosakgilgil
njari nama namgijako
aganna man·ja ; nama
gita nikoba choli·ja.

Apsan grangni do·o-
rang tom·dake donga.

— Manderang an·tangtang
gita dakgipa baksa
rorimbata ; uni gimin
mandeni cholonko uchin
uia,

BON·KAMGIPA

